

國朝駢體正宗

國朝駢體正宗卷五

上楊相公書

伏蒙諭示莽夷蕩定旌馭旋歸獨有木邦尚煩經畧以
聖朝威德元老壯猶及其內興之形壓以橫驅之衆譬猶
建蕭鈇以伐霜菜鼓洪鑪而燔落毳其爲殄掃豈須歲時
所望慎護起居順適機會蚤膺

褒錫以慰輿情不勝大願又讀別示以太岳在陝有年過
蒙閔念惠以宏獎許以騫騰恩意懃深倍越恒等發緘長
跼攬涕沾膺伏念太岳學不通經仕惟苟祿半通承乏一
紀棲遲幸而備位屬城歸身墻仞獨於稠衆猥荷品題納

頑礦於鈞鎔引散樗於規墨眊昧成飾咳唾爲恩求之古
人罕覩斯遇若乃宏之以啟牖降之以心顏推之以款誠
卹之以微至從容燕語容醉吏之狂呼稠疊恩私念小人
之有母施旣博矣望旣逾矣假令因緣際會微倖一時官
閥歲而九遷享侯封於萬戶猶未足以易此榮稱方其得
意者矣是故利鈍時也疾徐數也聞夫子之道則顏氏足
以自樂爲大賢所知卽侯生死而靡悔矧於薄植獲附青
雲出見縉紳忽增氣勢顧語孫子猶異知歸固將奉以終
身永言無墜豈復以緇素變其初終異同乖其本末而大
鈞所播滄溟自運旌旃一去山川間焉溯德水以方永望
芳塵而不見蓋良辰遂往盧中郎所以長號白雲在天謝

記室因而歌嘔違離之際每形歎言豈不以彌載之分斯
深藏心之好已固事乖曩遇感迫今途故嘗望幕府之秋
梧詠歸艤於春渚關雲隴水威爲紀德之塲瘴雨蠻氛並
是馳思之路長謠永夜役魂夢於各天撫臆蕭辰歎酬知
之何地者也豈圖大德未倦勤施垂敝之帷猶懷老馬初
陽之管下動寒灰惠風在遠而不遺曦景容光而必照遂
乃略其吏幹錄以年勞特假齒餘褒爲舉首欲使名書

御展聲徹丹霄賤璫而邁特達之榮飛蠅而望千里之致
晞陽豐幹未能喻此勇與流潤洪河無以名其滲漉此蓋
伏遇太師相公道鑄品倫量苞流壤明揚仄陋實聖賢之
用心登崇僞良繫荃宰之攸寄故以智周庶物德協旁求

馬勃牛溲方俱收而並畜亡蓼失履亦懷舊以圖新良欲
衆効於官材庶幾助成於

聖化顧惟小子豈所堪任方懼趨走違方行能無笑處囊
鉅頓曾無脫穎之期負輓聲悲終困摧輪之坂徒沉身於
糞朽乃玷累於甄收以此傍徨不寧夙夜然而士感一顧
女容悅已詠德懷仁賢愚等顧靡身百體蓋以云酬惟當
均義在三穆心不二重之以僇俛鑒之以明神溝壑未填
豈盡依風之望肝腸猶在庶同傾日之心不任區區感激
之誠謹奉白牋謝聞

答顧密齋書

王太岳

八月二十八日太岳頓首密齋廷尉閣下月前發使奉書
行六七日矣積雨苦淖尋已却廻僕方在試院中聞之悵
快而已方毓川藩長人還得閣下手書開紙數行未暇問
無恙首述離索之感於時秋雨微零閉門愁坐忽此棖觸
不知歎息之彌襟也曩於京師冠蓋溢乎九衢英靈萃乎
四海摘華振采則羲望退飛吐氣發聲則風雨總至彬彬
乎皇皇乎文章之林府人士之都會者矣僕以閭陋本絕
聲華在於衆中特爲寡侶適有天幸所遇多賢因緣結納
稍以滋廣松栢有相悅之性水火有既濟之義擅文采者
齊契於應劉砥行誼者投分於僑札遂乃揚厲風軌發麾

道素譏彈駁雜以暢遠旨飲酒歌呼以紓劬劇是故言必諧聲倡必衆和入則造膝出則聯鑣當此之時可爲極盛已而人事好乖飛沈路絕榮悴之勢稍異生死之契遽遠然而二三素心以晨以夕奔走同于緩急勞問交於歲時艱難之中彌篤風義此又一時矣其後荀慈解組惠仲改官旭莊以憂去閣下去而仍來僕旣牽復尋又外補兩年之間風飛雨散時事略殊矣然自修堂曉章容川履齋諸使君外居輦下者尚十數公並皆拔秀東南抽奇海岱明珠大玉照耀當時又於其間或官曹連接或門巷相望步趾可以通往來瓜蔬可以供譚讌自非烈風甚雨公私冗迫曷常不足叙遊處之好窮心志之娛者乎然而追惟聚

散繾綣今昔在於閣下猶且云然況如僕者又何以堪之
耶去國五年合心合臭之友眇然各在數千里外非徒考
德問業難復曩遊至於耳目聞見都非夙昔日惟纍纍役
役以苟歲年不知何時却得望見闕廷復與諸公抵掌歡
笑也自來長安氛雜之場日給不暇僕受氣素薄而矚之
不休以茲疲薶竟無好懷時時引鏡自照鬚眉猶昔獨其
膚體之間精華銷鑠面皴日加古人所繇深恨於形役也
靜自惟念歲月不居四十之年忽焉已至浮雲世事百不
足言獨以門祚式微迫思舉子上之取供老親含飴之弄
下亦自欲付囑琴書而年復一年了不可得莊生云知其
不可奈何而安之若命矧其實有命者耶安之而已所不

堪者填篋久廢姻婭仍疏偶影獨遊莫與左右時從稠人
廣坐笑語掀扈及其退處閨闔燈火蕭然殆同蘭若雖復
趨走滿前覲然人面舉眼四顧無可與語欲如閣下左對
孺人右操杯杓攤書課讀盈耳琅琅其爲至樂焉可得也
凡僕飲食服御常日之奉初無加於夙昔就令有之猶非
所好生平用意雅在人倫冀於其間得少樂地由今計之
自初通籍游竊厚祿才地凡下誠不足以報塞大恩至於
朋友離別之思猶復如彼家門老幼之懽抑又如此僕尚
欲誰與作計而爲此勞勞乎懷愁忍痛積歷歲年自知言
之何益但增忉怛爲閣下苦欲相問聊此發之耳石谿翁
終已不返華屋山邱從古所歎奈何奈何鄭八久不得耗

比有人從湖湘間來粗說動止大要視僕差可耳四維清
狂不減微閣下言吾故知之前書殊畧乏劣可想聞來日
人行會得小閒復作此紙期在意盡語多不檢閣下但自
覽觀無多示人此外萬萬自愛

答胡靜菴書

王太岳

正月十二日報靜菴明經足下使至辱書及詩辭理閒美
溫醇密栗初一披尋如搜篋衍斷簡忽逢非意所得在於
古人未論誰作挹其光氣固已非近物矣於時霽雪干林
朝暉一壑門庭闐寂軒序清明僕夙興罷盥負手行吟目
翫春蕙想寄遐外羣囂大遠芳訊裁通忽發封題曠然意
會於是披拂瑤席襲裊爐薰橫几伸卷正衿莊誦瀏然若
春泉之鳴谷粲兮如長離之耀天欲遂高揖曹劉近友徐
庾忽不自知置身之於何代矣若乃要眇融心鏗輞盈耳
散襟愉顏撫髀爵躍覲正始於今日歎太音之既希輒復
左喚鼎鑊右戛球玉抗聲長謠韻動巖戶至於朝食既廢

縹囊在藏光響所餘久而未寂成連海上其移人殆若此
哉雖然足下於辭是誠善矣顧其過許非所敢聞至於相
知似猶未盡不敢嘿息可畧而言夫春禽振羽尙感鳴陰
朔馬呼羣猶知附尾是故石交投分興言嘯侶之驩偶影
獨居厥有慕徒之戀斯含生之同趣恒物之大情也况僕
少於學問本乏師承壯遊四方始交賢彥遊處旣狎講習
滋多相與探蹟藝文研悅竹素今古變列黑白衆分至於
篇咏載賡譚諧間作機指旁驚意類交橫雖復語出因心
言非應會忽然意動歆若有神故得以朝啟夕發歲浸月
潤剪剔荒翳規恢陋陋引伸類長增益不能時以一二窺
見作者是誠僕之不佞而我友之大有造於僕也又僕門

祚衰薄填箴寂寥宗黨無人密親仍寡加復直性狹中剛
腸疾惡與世少可倫好用希眷惟二三友生與爲性命資
以朝夕實懷苦心比來原州初無相識平生游好眇然遼
絕閉門塊處出入無歡行坐忽忘耳目都廢時理舊策昏
然若蒙少之所業悅口厭心及此追尋了無可得嗟乎人
生適志歲月不居僕齒髮未衰而生趣如此足下謂吾樂
否耶自我之得交於左右契結苔岑情均蘭臭匪唯空谷
之希聲實乃曠代之鴻寶念初握手已如舊知試遣佗來
便荷惠肯足下於僕意良厚矣旣而西齋列榻東閣交筵
敷衽論心負墻問道跌宕圖書之府留連昏曉之期時復
對座探鉤分墉角技盤跚行藥則雅步聯翩攬腕鳴箏則

秦聲繼輪當此之時氛垢俱捐形骸兩化欲遂跨躡烟景
共挹鴻濛晚泰岱於微豪酌滄溟而旣淺良以極人世之
懽悰曠千載而一遇矣適會足下自有家事理不可留謂
此蹻歸尋當并合臨分要約珍重再三而白駒旣邁瑤華
却迴睠顧生徒徘徊池館述舊恩之難謝矢新知之日長
畢芳歲以爲期指載陽而復路義心苦調殆不勝情嗟嘆
長言至於累幅僕感動情文彌襟歎息義難重强祇益慕
思固當抑此蹻歡圖其後會始要之以蹻修終申之以信
使君情妾意託欸素於微波昔往今來盼佳期於曷月我
之懷矣君豈同哉洎乎改歲迨此泮水感七日之靈辰傷
遠藩之無預微吟芳草興起王孫側聽倉庚懷哉公子極

千里以送目顧白雲而在停於是候望之吏踵接於郊關
然疑之言心勞於龜策矣豈期雁候無憑魚書徒枉諱江
南之驛使曠望音塵抗西鄰之責言虛敵遲暮雖未訟言
於絕席亦已興盡於迴舟猶復近舍春遊遠規朱夏苟要
盟之不踐雖再辱以奚爲使僕志絕心摧迷途失計嗟乎
靜菴始僕所期於足下何如而足下顧且以世俗望僕哉
殆不可矣且夫巖栖谷飲者介士之奇懷也螭屈龍見者
大人之達節也故士或覲面而山河或楚越而肺附或鑿
坏而不顧或颺赴而響臻歷觀古哲趨舍千途義有所宜
出處一揆至如結納尤在信義昔者季布一諾人賤多金
元伯下泉神告冥漠是豈嘗剖券以徵償投膠以爲固哉

丈夫意氣守以終始風雨不足輟其音霜雪無以渝其色也重惟夫子忠亮之槩篤於天植疇昔之雅又辱寵藉咎鍾無不應之聲瀨水有俱留之性固已鐫誠金版旌信青松何有忽契濶之成言忘未乾之口血息壤在彼已復廻顏溝水西流便同行路者乎若夫稽康晚起懶慢相成長卿倦遊故多消渴而或眷戀鯉庭羈縻楚醴向平雅志尙淹五岳之期左氏研精未放三都之筆以此依違不遑軒騎是則迹有夷猶情非決絕日月之虧皆見桑榆之效非遠在於人事蓋亦有之然而周周之羽匪跬步而可離小人之智謂無言其不信故常積憂用老惟日當年以思子之爲勞將責脩於賢者亦何能不顧影而索歛因風而竦

請者矣願更深思勉果夙諾幡然廻慮嗟肯來遊方將與之歌伐木之章奏將雛之曲上之欲以師蓋公之清靜下之亦以樂南邨之晨夕散解鬱紆祛豁塵鄙則沒齒之惠所不敢忘若其必故都之可懷詆見賢之不道抗遠舉而不返顧去者以日踈前期既謬後晤仍愆使明珠綢綺志終奪於使君翠蓋青舟心莫通於王子是谷風所以怨其如遺靈均所由哀其數化在高義夫豈其然對使掾管心煩慮亂聊布斯指辭不宣心至若繆悠以寓言繁複以見志義乖唯謹體異擬倫非狂言之不藏恃惠子之知我也書去之日便與馳心側遲之誠必不虛望

答方柳峯書

王太岳

某白辱書以大集編撰已了不鄙褊維謬使爲序者發函
聘貽頰汗交顏逡巡累日不敢終逆盛指冒恥泚筆載忤
載笑夫蘭荃信美不充海畔之觀鐘鼓雖陳終駭爰居之
聽非芳薰之善變宮奏之未諧也性習所岐而知不知異
也是故祥金埋照待赤土而騰英天驥効材爲方歟而印
首古之英匠咸求友生至於文章亦從其類揚雲爲麗賦
而擬式桓子見高文而病發五官之許公幹妙絕時人阮
籍之遇張華才爲王佐司隸命車於張載君苗焚研於陸
機皇甫則序美太冲彥升乃歎深伏挺並皆岑苔結分蘭
翠相鮮輝耀一時聲名千載若乃文章自得陳思謂之達

言一人知己仲翔因而不恨豈不以同明相照同氣相求
作者良難知之匪易藉使人夸貴玉卽卞泣可以無傳家
擅參龍將葉公不復蒙誚慨其嘆矣豈不然乎足下清衷
淵照逸氣焱發運宰匠於元席總妙門於油素發言爲論
學匪佇於稱師感物造端腕每疲于授吏懸河落筆寧軌
躅之可尋罄谷量才何斗石之可喻潏潏乎灝灝乎風雨
不足爲之先鬼神不能制其變者矣若乃忠信以昭之經
緯以錯之知僥輕不可以樹骨故按衍以式度知促數不
可以赴節故漂搖以盡奇浮聲與切響相宣密理與清裁
偕暢高陵大谷甄鑄在心截貝編珠卷舒於手發皇言象
陰陽有奔命之勤欽吐宮商球磬無遺音之路固以燮諧

律永藻暢襟靈奮繹采於璇條導長源於珠海鷹揚藝圃
陋沈謝之無工鶚視文場目曹劉而已短誠宜秘彼鴻都
副之延閣懸國門而不易求宗工以賞奇何有問道昏衢
求音聾俗使侏儒奮喙欲參鳴玉之班雛鷺叫音妄議垂
天之翼譬猶被龍章而適裸壤標瓦礫以冠珠林何其左
哉僕器不賈時言不行遠徒以結習未廢輶材屬承誣諉
之勤遂與校讐之役攬漢京之盤悅未覺文繁襲楚澤之
芳芬真愁卷盡求其倫比知白雲之旣孤次厥篇題笑黃
金之有賈其序文今已卒業同集本納上顧惟屏質步已
却於自岷磬率卮言情欲同於繪日劉季緒之倚撫利病
寧有當焉徐偉長之咳唾雲星非其選矣昔者宋人遊於

嶺海草衣絮帽往造賈胡陳以火齊木難則爛然駭矚侈
以明金絳羽則嘉歎彌襟至與之辨列方名品第貴賤而
後市人攘袂觀者反脣僕之爲序實類於此所冀寸莛之
叩與鯨奏而流聲數武之飛附龍媒而遽遠榮以爲媿歎
息何如

答周芝山同年書

邵齊燾

齊燾頓首芝山九弟足下得六月四日告慨然增遠別之
恨頃以芳春亟申歡譙傾葢投分忘形定交疎狂年少之
時慷慨立身之始相與低昂今古嗤慕賢愚品藻淵流銓
衡雅俗屢陳直諒之益不棄芻蕘之詞或命駕不逢則迴
車靡樂經旬暫阻則採葛憂吟於斯時也松有悅柏之心
帶有忘腰之適矣奉教日淺歡娛未定尋值吾弟熒熒在
疚望窮陟屺行迫見星嗟夫嗟夫此之別也豈直絲路恒
悲關岳往恨云爾哉吸泣城闔含辭哽咽停驂郭門贈言
悽惻山川重阻薊北極於周南義望推移出水距乎流火
傷獨行之踽踽望遠道之縣縣追惟曩遊百憂集矣夏暑

秋涼攝衛何似努力珍護勉旃自愛弦望未期風雲增愴
所冀思夢潛符慈恩之遊有驗春風捲地中州之飛忽逢
略布所懷詞不宣脩

答王芥子同年書

邵齊燾

邵齊燾頓手芥子。弟政三兄同年閣下。前者遠賜手書。兼辱孤白之貺。炳也從都門寄來。悉已拜領。成裘輕暖。良朋與共之風。加飯殷勤。遠道相思之字。珍荷珍荷。歲月如馳。寒燠亟更起居。何如伏計。萬福。齊燾去秋再奉。

恩命中朝。知已數書。勸駕自念。學業行能。本無足取。早蒙雨露濫廁蓬瀛。至今扇影爐烟。渺然霄漢。書雲辨蠹。豈忘夢想。靈上不事殊非。素懷而身嬰痼疾。緜歷七載。胸氣不差。胛風頻動。加以偏親衰白。次子羸疾。事與意阻。竟成留滯。且道山冊府。雖號優閒。執筆賡歌。事資華國。非可但糜祿。賜荷爲榮。顯而已若。齊燾者。學本不豐。文思蹇澀。比久

荒梗彌成頽情縱加齒錄以何報稱加目眊腕戰作字疎
放珥彤之職非復所勝以此更思周任陳力之訓深惟柱
下止足之義每念身雖退閒猶托舊恩別異凡庶姓名瑣
末蒙

至尊之記憶

時巡頒賚預彤庭之分帛其爲恩幸撫已踰分何意更希
榮進乎若謂盤桓不進以爲名高於其乃心勵其翻矣辱
閣下知愛貴相知心耳昔在京師與諸君遊處皆文人勝
流詩酒流連亦可謂極一時之歡也年在壯盛未計其後
春花秋月忽爲尋常脂車屣履視爲易得猶或經旬曠面
踰朔方叙使知年事一往良辰難再雖夜夜秉燭豈所惜

乎三復來書重增感唏情多地遐所思處處不獨於閣下
然也往時於諸同年中商榷文事拊撫今古與以銅炳也
芝山元調議論相發尤多助益然自度學淺才薄終無所
成家居以來每欲放意篇籍離事遠俗以保幽素而終不
免爲塵務所擾又家事不可屏除凌雜旁午恒自鹿鹿近
又被病心神懈散不復更能措意文字矣閣下索其前後
所作欲相流布方復許之以遠到古人期之以典型後學
談獎過實將所謂愛而不知其惡者乎平生於古人文體
嘗竊慕晉宋以來詞章之美尋覲往製泚覽前規皆於綺
藻豐縟之中能存簡質清剛之制此其所以爲貴耳發篋
檢素頗會此旨搦管含豪遂無一驗根柢疏薄智力凡弱

詞不副意意不逮見少時不學今復何及性既益懶草藁
多未存錄重違來旨謹繕癸酉以來雜文十餘篇奉塵清
覽少塞厚望聊存別後相思之資庶當寡過未能之驗昔
陳思定敬禮之文昌黎改玉川之句通人擊彈古今所貴
脫垂糾正啟其蒙滯於萬里之外獲一隅之益亦索居之
一快也今春辱同年潘常州聘承乏龍城書院本無意遠
出蘇常接境歸省不越信宿此可欣耳先世本有遺產足
以自給近旣分析頓減重以積年委托非人耗失大半素
不工治生方當隨事盡撙節之理耳聞炳也歸計已決當
以夏秋促裝家旣益貧懷抱復多憤激閒居殆非所堪當
復不免奔走於外耳星岡頃奉使至揚州未及一相見甚

悵悵閣下乘時有爲方大展所蘊勉矣自愛儻遂得移旌
吳會實所引領書不盡意惟增悵悵

聖駕東巡恭謁

祖陵頌序

代少司馬汪公作

邵齊燾

臣聞名尊域大必隆自出之祀德統乾元必祥本祖之典是以景員松柏藻歌商楹高山潦沮騰軌姬籙闡祥由其卜昌釐風以之歸厚於皇時清克綽永福重代

列聖連光緝熙綿綿寶胄積石未測其源巖巖璿基極天罕階其峻若水頽祥之地繞樞電而湛星虹橋山降魄之墟擁熊羆而蔭雲物巍巍

三陵長發其祥在瀋之陽實曰盛京三垣考耀應箕尾而疏基九野分疆跨幽營而表域削成長白抗終南太華之峰浩浩渾江洩溫洛潑河之兆瑤臺偃蹇外大國之幅隕

皇澗滌洞篤公劉之締構珍符欲集宇宙灑其氤氲運會
將開山川鬱其精氣紛綸六籍載休祐而猶疎茫昧九邱
紀瑰英而未徧赫矣壯乎泰紫之殊庭坤靈之寶域者也
粵若履武康禋覲天錫羨雲雷寫慶瓜瓞迎釐神武濟世
舊邦新命造家拓迹式廓用增人告其心天與之宅見龍
有象文明開九二之爻鳴鳥來儀至德定三分之業及黃
鉞載麾白魚斯躍戶牖六合文軌八荒旣度燕薊建我京
邑肇基之地是爲留都若其重軒雙闕之麗參塗九市之
殷千廬八屯之周百廛萬雉之密粲乎隱隱與京師同制
信足以奉

陵邑而固

皇根隆上都而觀萬國者乎我

皇上下武受圖累仁嗣構握鏡陳樞寢繩抱表勝殘去殺
之化成憲章稽古之烈盛協氣之所翔遊淳化之所甄冶
威明之所震耀聲教之所布濩淪深格高縣宙浹宇百年
膺慶鍾明傳之期九世恢基考祖宗之德固已道藹配京
勲炤紹庭矣猶以象耕靈隧展軫之路方遙龍鼎幽宮升
香之禮尙缺蒼蒼畢隴鬱鬱春郊永懷弓劒彌愴霜露昔
在

皇祖三恪祀事上以崇本報功答

列聖在天陟降左右之眷下以巡方省化知民風土俗王
業艱難之自斯乃國家舊章神聖遠圖不可闕也爰命有

司脩法駕除道東巡內外齊肅粵以歲在昭陽月旅夷則
登谷告期載嘗竚典

皇上乃奉

皇太后發軔紫宮清埃遶左駕離光之六鳳御文命之雙
龍山靈護野方神啟路黃麾紫蓋出霄甸而馭風雷赤芾
金貂扈烟途而序鵷鷺靜帷宮於綠野仍循問膳之儀肅
帳殿於黃街尙展含飴之樂桑麻郁郁夾輦路而鋪棗黍
稷與與委珍阡而緝錦若夫取材講事順農隙而耀威靈
舉柴收禽實君庖而登俎豆諒軌物之所經豈遊娛之爲
壯是用三驅疊鼓焚萊遵秋獮之期六駿駢衡升阜贊梁
騶之典周岐協吉商網均仁武士行庖訾黃踰足風馳霧

集長驅虎視之庭岳運川回直指龍飛之宅桑梓依然粉
榆在望問裳衣而追舊巡兆域而永慕睟容有穆孝享用
蠲於是諏吉練辰質明行事祝奏嘉至工節采齊洞屬幽
喻優肅顯詔官職有序駿奔秉德黃彝玉豆告嘉栗於靈
阿翠葆金支接神庠於詠蕩山礪犧象懸二曜而應東西
大瑟中琴列重檐而考虞夏反本修古十倫三詔之禮全
肅倡和聲九磬八閤之樂備河龍供鯉豐融享右之符玉
柱生芝磬隱淵祥之氣五精會而虬麟訛百靈朝而魚馬
躍於斯時也穆穆焉皇皇焉濟濟焉洋洋焉愛懋威致樂
哀乃半騰漢典於視奄跨唐規於獻服者矣旣而存高年
採遺俗省歛清吹周睟城邑御總章之行殿布如綸之渙

號中陽白水仍邀置酒之歡烈文辟公共錫無疆之祉文
德旣昭武節是厲則有星墟列將能行鵝鸛之軍天策神
兵本號熊羆之士犀衣烟聚貝冑星敷申秋令而習威儀
肅軍容而明坐作七驕厲飾載旌旐而張舒三表鳴鐃按
屯營而簡練囚斯以讐泰武於遐外懽威稜於鎮蕃震疊
之義斯存懷柔之化彌遠豈直西園大閱戈矛若林洛水
作師秣幹有奭云爾哉然後振旅神都移麾靈嶠翊雲駢
而轉蹕遵皇衢而復路邦基有萬年之固鼎業有如山之
重懿繅之蹟猗歟偉歟且夫報本追養配天綏饗鴻慶也
時邁車攻觀風會同茂典也大禮大樂神人允若治本也
乃文乃武威福率土化權也用能經綸萬樞雍動八表道

凝克紹垂衣馳金冊之功義極如存指掌謚黃圖之運窺
刑纂懿湯孫無竝轂之因炤史瞻風似啟入扶輪之列考
巡遊於往事則汾射韜芬第嘉頌於從臣則卷阿避德臣
沐浴元化遭逢休典慶過從郊歡溢陪禪竊以潤色鴻業
揄揚上德臣子舊職朝廷通議遠希猗那濬哲思文清廟
之作創椎輪於前近慕相如子雲孟堅太冲之徒馳金羈
於後輒用課轅缶之末音塵日月之廣照識方庸瑣謬續
康衢之吟思塗猥局有媿清風之藻

送顧古湫同年之荆南序

邵齊壽

別方不定萬族共其銷魂秋士多悲四感紛其在抱品物
恆性皆懷求友之歡含生大情咸有慕徒之戀至如及關
聞嘆登岳流謠郊路班荆河梁攜手羈旅離別之際古人
亦皆有不能已者乎古湫四兄日下無雙江東獨步同年
之友一時之傑齊瑟自奏見奪盈庭之筭隨照相投或按
中宵之劒京塵淹久亟共暄寒歧路無端乍乖雲雨粵以
建亥之年仲秋之月將從蓮府遠適荆南月明千里蟲吟
四壁風篁淒而軒序涼烟嵐清而林野肅寒蟬抱樹驚征
客之秋心候鴈銜蘆極愁人之遠望指塗衡霍擊汰沅湘
杜汀蘭晚正則之所行吟陶牧昭邱仲宣之所遊目涉彼

迴路謝此倫好離筵召悲別景加促執手一去填膺百憂
於時如蘭舊侶傾蓋新知竝爲歌詩以慰行役昌黎之留
東野有願爲雲休文之別安成還期識路故人遠去蒼黃
贈處之言密友將離慷慨攀援之意輒用序而錄之凡若
于首其詞云爾

送黃生慎鏞往徽州詩序

邵齊燾

黃生漢鏞故以童子受知武進賢令新城王公王今擢徽
州府同知兼攝郡符將往從焉路指歙溪棹開吳市煙波
渺渺嶂嶺盤盤事迫饑驅義兼負米情篤知惠性愛巖壑
粵以首夏忽乎將行余講文此邦纔逾二載空空自笑愧
韓愈之抗顏濟濟相趨得孔融之小友方欣起予遽慨離
羣目極長衢心馳遐路垂楊濯濯落絮縈愁芳草芊芊成
茵藉恨谷禽睨眈求友相鳴津樹扶疎落帆何處西陵浙
水知有遇風之詩漁浦桐廬會無維舟之待新知生別悲
樂萃於一時病骨空囊勞懷極於千里不能餽贐壯行酌
樽叙別裁詩四首聊代疏麻漢鏞旣得余詩卽夕盡次其

韻清源自濬逸藻不停感藉詞傾情緣墨露嘗覽陳書見
孝穆與總持唱和乃言吾詩寄弟集中今老夫此詩亦欲
寄漢鏞集也

誥贈朝議大夫滄崖袁公墓誌銘

邵齊齋

公諱鰲字滄崖姓袁氏寧波鄞縣人也其先世居豐城宋
刑部尙書天祐從高宗南渡遂家于鄞五世而至進士鏞
死德祐丙子之難舉家從義十有七人又四世而爲明太
常寺少卿珙生尙寶司少卿忠徹卽公之九世祖也伯輿
之仕周室七姓從王卞壺之衛乘輿一門受命奉常贊事
秦時典禮之官佩璽從行漢世侍中之職門閤載崇羽儀
有耀忠規智節史牒詳焉高祖承伴曾祖瑤鄞縣學生祖
慶運父茂啟贈朝議大夫竝德崇天爵道被人倫模楷重
于一時忠信聞于十室公家承清白氣稟淳和體上德之
冲粹殫下學之沉研旣勗朝聞彌勤暮習每至明星在東

曉漏已盡正襟危坐諷詠無輟朝趨市者往往望其燈光
就而請火咸共嘆其篤志燎麻未息便知劉峻之居松節
猶燃遙辨顧歡之室豈止握卷屋上隨月而升讀書宵中
鳴鐘爲限而已居家必恭言動無苟嘗飲于人頗極歡洽
三爵以後由醉之言醒而自責遂斷栢杓衛武賓筵之悔
早在立年顏氏心齋之誠豈徒數月竟同韋曜見寬孫皓
之筵長似公榮坐絕棼冲之勸不貳其過斯之謂乎公以
積學高行有聲黌序而襟尚希靜情懷澹泊學非干祿言
不爲華未嘗揣摩世好以求榮進飯蔬飲水味道酣德居
貧樂志名利不入其懷處約安仁塵雜罕經其慮嘗遊江
淮及過燕薊執經之士雲集其門眷戀庭闈言歸邦族孝

乎惟孝友于兄弟溫席扇枕明竭力之義頃唱篴和篤同
氣之愛人倫之美宗黨稱焉至于風裁清高門庭峻潔交
必束修之儒談必彝教之旨後進憚其嚴重鄉閭歸其老
成足使盜牛之子自恥聞名食雁之賓無因抗禮公雖身
名未達終老諸生惟德與齒達尊有二令聞不已閭然曰
章嗟乎崦嵫之景易收少微之光俄掩適來適去老氏云
徂啟手啟足曾與長往嗚呼哀哉公生于某年月日卒于
某年月日春秋八十有一夫人陳氏繼夫人曹氏黃氏程
氏竝風高形管操美蒿簪協南澗之芳猷闡中閨之淑問
長子德達乾隆壬戌進士刑部陝西司郎中加一級木訥
近仁質直好義季路有折獄之才于公有高門之慶次子

德進詩書之澤不墜于爲箕謹飭之風無慚于刻鵠咸以
心絕志悲痛深罔極親營高敞經年得焉乾隆十六年十
一月恭遇

皇太后六十萬壽覃恩中外贈公朝議大夫刑部陝西司
郎中加一級某年月日葬于某所以三夫人祔卜其宅兆
孝子事親之終葬以大夫王者推恩之禮公年逾耆耄行
成坊表和而不流直而不紱質而不野矜而不爭取友以
寡過相期講學以躬行爲急可謂天之君子今之古人生
也有涯百年俄頃嗚呼哀哉齊齋仰止下風分深恒契公
之長子實我素交見托斯文敢辭荒落謹揚潛德用誌幽

宮銘曰

媽墟誕慶袁鄉別族西漢儒宗東京世祿祭忠於宋茲相
於唐支分葉散源遠流長趙氏中葉凌江創址靖康鹿走
建炎龍起尙書衛難從駕南征卜宅鄞江來自豐城門承
忠孝代傳軒冕七百餘年弓箕載衍誕惟令德抱璞含真
一鄉善士百里賢人學不干時行無慚影華非繡輦汲有
修綆遊心於淡味道之腴不求聞達奚損窮居薤露易晞
隙駒難繫俄驚山壽長悲川逝生也無位歿而贈官榮霑
三錫寵溢重泉孝子蒸蒸送終禮洽親卜牛眠載營馬鬣
安其體魄貽以令名歿而不朽敬述斯銘

沈觀察從軍集序

劉星煒

國家玉虎銜書銀麈數貢言從井絡載建參旗秉鉞而鑿
凶門贊鼓而馳絕徼咨於方召式是應劉維時沈公磨盾
晨嚴聞鷄夜起皂囊啟事深嚴密勿之司

紫禁簪毫清切論思之地晨趨豹尾敬爲蒼生曉度龍沙
還參黃閣爰是短衣匹馬王仲宣束髮從戎走檄飛書枚
大夫登高能賦爾乃間關鳥道叱馭蠶叢五丁破斧之山
盤礪直上十鼠磨牙之穴秉燧宵征則文園有難蜀之言
武鄉上渡瀘之表迫乎鼂令爲梗蔓子未殲猿鶴沙蟲競
灑元黃之血鞠窮麥麴驚呼米醬之儲此則聽谷口之鵲
啼悲同零雨望水中之鳶跼氣盡前溪者也旣而郭令籌

邊晉公入蔡升庸揖客獨高汲黯之名妙選儒官復用繞
朝之策遂乃揚于苗格因壘崇降銀河洗兵甲之光銅柱
勒丹青之字於是酬勲麟閣 賜宴瀛臺

天子以公實總師言奉揚密命削稿懲屈原之失論事兼
陸贄之長鳳屐銜恩隼旗出守旋以南交重地左轄崇階
載降璽書授之使節古訓是式仲山甫于蕃于宣萬民所
望召康公勿翦勿伐偉以盛烈聞於遐邊公乃盛檢縹囊
深鑄翠琬嘻噦蜀道多閔勞戍卒之詞點竄韓碑著詠
聖神功之作今者黃圖遠廓紫甸遐開一尉候於流沙偃
鯨鯢於絕塞清江碧海爰資作楫之重臣典冊高文還仗
磨崖之巨筆

爲勝國閻陳二公徵詩啟

劉星煒

我國家箕緯膺圖元都御籙天戈所指反舌無聲海水來
宗夜郎不大爰是軫秦庭之哭電掃黃巾彰殷武之威風
馳紫塞漸臺放仗揭竿行王莽之頭鉅野殪兇分豕磔蚩
尤之髀三靈祇若六宇謳歌嬰子奉以龍圖高寢遷其龜
鼎斯時也八州牙纛上璽綬以請纓五等貂璫望軍門而
解辯蓋以韓仇已報留侯義得受封商命不常祿父勢難
梗化鵜飛鰈走盡戴

皇與蕨苦薇甘寧非周粟然而蕤君布日氷崖留獨冷之
蠶異母迴飈珠岸苗反風之草其有七旬逆命二尉嬰城
雖吠昧尊堯亦哀同望帝詳其軼事良足慨心日者明祚

既終燕雲告難翟泉蒼鳥盡蹴飛沙鄴苑銅駝俱淪廢棘
北斗珠旗簪日甲子徇師南朝鐵鎖沉江庚申出迪惟茲
水國古稱鼃鼃爲隣况值隆車雖有螳螂不怒維時陳公
倉皇銜恤慷慨登陴封江上以丸泥驅市人而制挺九衢
僉楚皆爲李勉之兵百雉崇墉卽是王隤之塚我

朝於是命戈船而下瀨揮彈羽以張羅飲馬於河雪滿騶
駘之廐連鷄爲柵天長驃騎之營藐爾孤城方猶黑子先
此孫恩內犯十年未復瘡痍今茲祖約乞降七校爭爲鄉
導爰以閭公夙膺于擷劈海而掃鯨鯢素習戎韜臨城而
嚴蛇馬公果懸車無懼成竹在胸鍛矢輶車長社之百樓
未動復隍填塹晉陽之三版愈艱燒殘卽墨之牛神燈自

炳川盡琅邪之稻鬼妾可餐

皆圍城中事

饗士中秋壓角而悲

歌鐃吹行師六月帕首而更插犇刀所以南頓舊臣先傷

賈復臨濠名將幾實花雲羣公誓斬嚴顏

天子思招余闕鴻置疎綢

命輸攻揭以虞旛窮島飛書詔橫來蠲其釁社嗟乎愍懷
盡室血而朝天高武孤孫青城搏額正使杜鵑啼盡難駐
遊岱之魂精衛銜殘哭補窮桑之堅矧復陸機入洛河橋
登上將之壇庾信適周開府進儀同之號二公使勉遵朝
旨早豎降旗出臯羽於西臺坐左車而東鄉文淵擇主終
高銅馬之助雍齒封侯勿替礪山之誓其視呈身短簿投
老蠻參汝鼓汝弓已盡國人之報江花江草何關野老之

悲而乃斷捐無歸裹瘡復戰此則缺斨破斧公且所以悲
來觸石移山愚公因之坐隕者也果爾江空木杪莫禦龍
超風墮紙鳶難爲墨守靈鼉不舉鼓已絕於死聲妖鳥爭
飛人復遊其生魄黃旗紫氣爭聞班馬之聲哀雁嗥猿齊
和守陴之哭二公雷霆屹若鋒刃恬然旋出火以自燭共
膏原而奚惜焚巢殺卵折戟沉槍邨山同穴誰歸先軫之
元燐火紛流孰辨長宏之血綽最已憐其併命眡盱復痛
於懷沙

閻應元二子
後渡江溺死今者

帝網恢張天閭昧蕩屬勝朝之苞孽盡賁金鷄凡華表之
遊魂俱招唳鶴穀城片壤與魯國以後降沫土故封憫殷
頑之待盡從此奎章正史遂傳韓通丹鼎爰書不名程濟

然而實沉無祀峴首沉碑追恫鬼雄益彰官諉某緬懷前
詰載訊邦人知廣陵彈盡之時近祇樹香聞之地修羅戈
戟罹劫燒之三災江表芙蓉建高臺之一柱文饒武鼓摧
殘薤露之歌桂棟杏梁黯慘平陵之色所冀咏懷古蹟少
陵述以寄言勸獎忠臣坡老貽之碑版

講筵四世詩鈔序

朱珪

講筵四世詩鈔十卷桐城張文端公與子少詹事隨齋公
太保文和公少宗伯蔣齋公少司空思齋公暨孫檢討魚
床先生侍講中峻先生閣學晴嵐鏡壑兩先生曾孫少詹
事樞庭先生之作也公父子入相一門鼎貴人各有集茲
冊之編標銜彙次尊

經筵之鉅典尙

講幄之渥恩以示子孫光紀載可謂盛哉其曾孫宿州司
訓曾虔示予讀之且請爲序夫冠蓋清第詩人資以立言
令僕世系史家爲之作表然而纓組七葉惟恃門蔭河岱
萬年皆由勲舊公則王顓聚書范喬留硯貽謀之臧並舉

詞科稽古之榮疊升經席極雕龍之世禪資藻卷之日新此其隆遇一也韋平之貴經術可以致君異同之辨殿中尊其專席乃或擁北北面喬梓末世其官授易東宮弓冶僅濟其美君子之澤易盡專門之學亦衰公一經相授四傳未艾車馬拜賜實兼

三朝春秋起家遂光累葉溫室之樹家公不言華光之講曾孫克敏此其隆遇又一也若夫法言之進無揀冲息邇英之辭恐虛啟沃臣恃舊學之親君厭苦口之數省覽未賜寵賁不終公一門四世之榮實千載一時之盛值堯舜執中傳心于十六字伊呂應運見知于五百年

御論首發得聞要道抑戒既奏同游太和每因一日之接

遂折六藝之裘經幄較親

綸扉特晉或游歷槐棘或出司喉舌几杖錫于暮年棨戟
光于後嗣並因侍講益利用賓終始一心生成再造此其
隆遇又一也至于有韻之文莫先于經其音之矢並列于
雅揚馬倡進御之篇賦頌鮮傳信之語侈陳祥瑞乃紀黃
龍虛誇戰功僅來天馬爲之君者不能六五帝四三王爲
之臣者雖有述作其義不實其言慚不足以傳世而行遠
也讀公家集翼我

國史慶

列聖之相承快萬里之日闢武成之頌非侈開邊

文華之侍益詳典學遭逢旣盛典冊遂多虞廷元首之颺

周詩單心之句被于樂府編爲實錄此其隆遇又一也珪
不及見文端公而于侍講閣學少詹先後同直館閣子瞻
悼逝未見范公昌黎殉知宜銘馬監游君子之鄉典型不
遠識大賢之後編輯方勤用敢先以乘章非僅光于旂常
云爾

大閱禮成恭紀鐃歌序

朱珪

臣聞金支玉葉天開軒帝之營丹水青邱地紀神堯之武
白鳩降籙秉鉞而荷共球黃鳥樹旂總干而齊步伐耀德
自我懜威無外南有越裳之車西有密須之鼓載在方策
莫不稱焉我

皇上握乾機履坤策三光榮鏡四時和燭流沙蟠木砥顙
頊之文戈北發南交戴重華之玉斗登歌

三后土揖萬邦問沒羽於雋僥驗專車于汪罔威弧井絡
下五峴之妖禽昕鼓橋門列三山之侍子文德則鞶褱如
歸武功則韞韞有奭所謂自我天覆丕冒日出者也景彼
隼夷揚矣西土川分碎葉稍當濛汜之東海近牢蘭更直

康居之北昔革面於

兩朝今離心於四部

皇帝龔

上天之命揚下武之光神緯爲謀日中必赧招搖所指秋
毫當羊角之風扶服其來春霰得龍銜之照兵無殷刃敢
不抽房埽衛拉而擒王厲伊犁而洗馬昔神禹之征饕餮
阻以三旬武丁之伐鬼方僅于一克若乃休屠太子上漢
殿而珥貂頡利小侯舞唐宮而稱兇方之今日曷足參乎
鼎魚小沸牙璋再舉籠山絡野搜欽鵠于園中掣影奔霄
追飛廉于海外貫胸反踵之族問彼游魂銅頭鐵額之兇
化爲異物天囚貳負之尸水戮九嬰之厲星旗西轉則月

窟爲空雷鼓南鳴則金城不閉將使參天大道除於鷗鵲
之泉分地高車置爲雞鹿之郡于是貴山慕德善馬來琛
效白狼歸日之忠遑烏弋驗風之使龍文魚目非關漢將
之求茲白乘黃盡入周王之會別有大小布露左右花門
背鐵勒而來王款玉關而殷頰其時

天子方九秋講事威揚綏遠之軍三載朝宗瑞輯伊綿之
峪帷宮拜爵鸞旂扈馬然後千門萬戶開閭闔而覲

天玉具金龜扑衣裳而罕地蟬蛻向內鱗集仰流娑夷之
重譯未歸宛國之西鄰又至

皇帝將教大閱以治兵會遠人而觀禮龍輅先期鳳輶效
駕湯山北駐環萬幕而雲屯涇水東流浴重輪而光動于

是

乘輿乃升四正眺三盤蚪林低翠葢之風練瀑射虹旂之影壓礪石而晨青控薊門而宵紫龍池通氣重來渥水之駒桐嶺連霞卽會釜山之玉是時宛右月支之部悔西雷翥之濱厥角稱臣歸身請吏

天子蹕青驪而受贄張赤帟而詢風雕題深目晉三接于龍光重舌左言徹

九重之天聽西旅底矣

帝車廻矣葢猶未轅乎南苑也乃建辰旒之十二列星校之三千仗馬歎雲儀鸞縹野鼓車殷地則天驥從東闕戟趨風則單于自北然後整六師于飛放馳七萃于柳林張

陸散紫燕之蹄鞭海合元虵之尾染風毛而彗地金僕橫
飛落雲翮於垂天青莖直上韓鷹未涼睨顧兔而輪孤蹲
甲餘酣羿天狼而芒靜方且星流蒲海封彼長鯨羽飲葱
山獵其雕虎繳大風于北隧弋巨鳥于西荒一發而獲名
王三驅而網下國豈直表貉致禽抗皮服不而已哉于焉
張翡翠之帷御鳳皇之邸舉紫行魚騰車命酌朱提轉斛
醉敕勒之于人烏獲飛橦陳犁軒之百幻神仙金闕歆蜃
氣于晴空堯舜榮光召龍圖于俄頃是則晉水璿臺之享
九驥翺翔洞庭廣野之張百靈踴躍者也四裔旣賓六軍
宿戒

皇帝遂以中冬之吉舉

大閱之典是日也鷄尾旦中羽林肖駕鼓鐘會食擊斗騰
褰天垂五色之雲人作千夫之氣司馬弊旗條狼誓馭金
奏而九夏終雷聲而

六飛出

天子登乎九成之臺觀乎萬全之陣組練凌輝戈鋌捎景
八風析羽中天懸赤日之竿五緯分芒應地舞黃龍之纛
乃御金山之貌胄擐闕輦之鯨函南斗佩其紫阿東井杖
其黃鉞唐弓虞弭對甲帳而開朔月貫星聯抱丁侯而拔
鏃授子則六軍挾纊提馬則萬騎銜枚龍角天鳴夔夔地
奮駢旄麾赤旗動焱車走戟金汁連珠燧牛象而排山沸
駕鶩而然海崑岡裂石之聲湯谷流金之燄徒趨鼓臧丹

烏翽大武之牙陰霽陽開朱火照成湯之旆中分鹿角縱
虓虎于重門橫貫魚鱗掣靈鼉于一手三發三刺九天九
淵日月爲之徘徊風霆助其響厲光耀乎西夜之庭威讐
乎無雷之國觀者屏息聞者墜心可以鎮麟海而不波屈
蜺羅而左注堂堂乎虞夏之羽千殷周之仁義也樹騰豹
以殿軍鳴金饒而振旅愷獻之樂作飲至之禮昭慶賜遂
行中外大悅然後旋華轡面

紫宮象輿婉憚于南門鷺鼓魚烏于

北闕千官徽佩抱暎日之光華萬吹鏗鏘和鈞天之巨麗
皇帝爰坐明堂負斧扆赤蛟白澤弭節而霞開玉馬金牛
揚鈴而颺發撞華鳧之鐘震靈鼉之鼓鴻臚六唱宗伯九

儀受八表之販章會四方之離僭正義星于若木更惕
堯心鏤禹字于崑崙猶陳益贊文子武取賞春罰秋佩圖
矩而四和闢廣輪于兩極矣臣榮與簪毫識窮窺管虞環
自遠莫名刻王之勲周鼓同文竊慕雕蟲之技謹奏饒歌
三言至九言凡七章敢陳七德之歌敬誌九功之叙